



Ina planisaziun a lunga vista segirescha il gaud da protecziun dal Grischun

La planisaziun per il svilup dal gaud è ina basa indispensabla per cultivar e per tgirar il gaud en il chantun Grischun. Ils plans chantunals per il svilup dal gaud èn actualmain en elavuraziun, ils emprims dus fecls d'object èn ussa pronts per la consultaziun.

Circa in terz da la surfatscha dal Grischun è gaud che sto vegnir cultivà ed utilisà cun cleras finamiras. Il svilup dal gaud da muntogna s'extenda sur generaziuns. Quai pretenda ina planisaziun seriosa, intenziunada ed a lunga vista. Il plan per il svilup dal gaud (PSG) procura per in'utilisaziun duraivla e segirescha ils divers interess publics envers il gaud. Ils ventg PSG existents vegnan remplazzads tras tschintg novs PSG regiunals ed illustrads cun fecls d'object. Sper ils princips chantunals pon uschia er vegnir resguardadas las particularitads da las singulas regiuns. In PSG consista da set fecls d'object che cuntegnan ils differents interess sco protecziun cunter privels da la natira, produenziun da laina, natira e cuntrada, recreaziun e turissem, agricultura, spazi da viver per la selvaschina ed infrastructures dal gaud.

Fegls d'object gaud da protecziun e gaud da pasculaziun

Circa 70 pertschient da la surfatscha da gaud è determinada en il Grischun sco gaud da protecziun che protegia vitgs ed infrastructures cunter lavinas, crudada da crappa e bovas. En il chantun è la funcziun da protecziun la prestaziun la pli impurtanta dal gaud. Il feagl d'object gaud da protecziun fixescha en in plan la surfatscha dal gaud da protecziun. El explitgescha las strategias che duain meglierar e segirar a lunga vista la protecziun dals gauds. Ultra da quai vegni reglà co ch'ils meds publics vegnan impundids per la tgira dal gaud da protecziun e co ch'els vegnan repartids sin las proprietarias ed ils proprietari da gaud.

En il Grischun ha il gaud da pasculaziun ina lunga tradiziun. I sa tracta qua d'ina utilisaziun maschadada che ha la finamira d'obtegnair – ultra dals products forestals (protecziun, laina, prosperitad) – er products agriculs (pavel per il muvel).

En il feagl d'object gaud da pasculaziun vegn preschentada la situaziun actuala da la pasculaziun en il gaud e giuditgada sia influenza per il stadi dal gaud en general e particularmain per la funcziun da protecziun dal gaud. Sco resultat vegni constatà nua che la pasculaziun è permessa vinavant en il rom actual e nua ch'igl exista in basegn d'agir per reglar la pasculaziun.

Cooperaziun en il process da planisaziun

La cooperaziun da vischnancas, da federaziuns e d'instituziuns interessadas sco er da la vasta publicitad è in pass impurtant en il process da planisaziun. Ella ha lieu en duas modas: Per l'ina sur la pagina d'internet www.wep.gr.ch creada spezialmain per la revisiun dal PSG, u convenziunalmain en scrit a l'uffizi da gaud e privels da la natira. Infurmaziuns dattan ils tschintg biros regiunals a Schiers, Tumein, Glion, Casti e Zuoz u l'uffizi da gaud e privels da la natira a Cuira.

Infurmaziuns:

- Reto Hefti, selvicultur chantunal, uffizi da gaud e privels da la natira, tel. 081 257 38 5, e-mail: reto.hefti@awn.gr.ch

- Riet Gordon, manader dal sector per l'infurmaziun davart il gaud, uffizi da gaud e privels da la natira, tel. 081 257 38 55, e-mail: riet.gordon@awn.gr.ch

Gremi: uffizi da gaud e privels da la natira
Funtauna: rg uffizi da gaud e privels da la natira
Data: 30-06-2015